

Augsburg, 29. Oktober 1569

An Theodor Zwinger

UB Basel, Fr. Gr. I 11, fol. 324r.

S. Accepi tandem, Clariss[ime] vir, D[omine] et amice colende, literas ab Oporinianis, quibus pollicentur, se hac hyeme Isocratem absoluturos: quo in proposito vt persevererent, multum in cohortatione et autoritate tua situm erit. Episcopius tandem Specimen speciendum exhibuit, cui ego breui, vti spero, totum Demosthenem, Aeschinem, Vlpianum cum meis annotationibus mittam. Petierunt eundem et Oporiniani. Sed quò minus eis gratificari possem, cessatione illorum factum est, et fides mea postulat, vt Episcopio praestem quod promisi: modò ipse etiam stet pactis et conuentis, editionemqúe instituat tanto autore dignam, eamqúe maturet, vt senectutem meam multis morborum molestijs afflictam recreet atque exhilaret. Neque enim minore desiderio hunc partum expecto, quam Oporinus noster τὸν τηλύγετον ιμμανούηλα vidit: quem valere et vigere è Ioanne Mair atramentario, libenter cognoui. De legato Cariniano antè semel atque iterum ad te scripsi. Sed rogo vt ignoscas sollicitudini meae. Neque enim literae semper perforuntur, et semel amissa occasio non facilè recuperatur: quae quidem eiusmodi est: Fuggeranus siue minister siue procurator Sebastianus Zaeh, mihi indicauit, sub Cal[endas] Ianuarias D. Iodoco Pfeiffero pro Bibliotheca Carini nostri 600 f. Argentinae fore numerandos. De quibus, si ab illo iussus fuerit, sit 50 f. detractus mihiqúe libenter datus. In eo igitur res est, vt vel Pfeifferus vel Luzelmannus scripto aliquo suam voluntatem illi significant, mihiqúe et formam poculi et insignia cum inscriptione depicta mittant. Sin Luzelmannus aliud voluerit: aequo animo praeinitum terminum expectabo, si tamen expectabo. Nam ἀρθρῖτις καὶ λιθίασις me ita infestant, vt saepe, vrgentibus cruciatibus, vix sperem me annum posse viuere: eoqúe magis studeo fructum aliquem capere laborum meorum. Nam posthuma proles parentem non nisi spe, eaqúe incerta delectat. Vale, et pro solita humanitate tua meas nugas curare dignare: εὖ δ' ὕσθ' ὅτου τις τυγχάνει χρείαν ἔχων τοῦτ' ἔσθ' ἐκάστω μεῖζον ἢ Τροίαν ἐλεῖν. Augustae Vindelicorum. 4 Cal[endas] Nouembbris 1569.

Hiero[nymus] Wolfius
Tuus.

Adolescentem γραμματοφόρον, si sine molestia et incommodo tuo iuuare potueris, vt apud vos receptum aliquem habeat: rem gratam mihi feceris, et humanitate dignam. Cui si hic prospicere potuissem, propter probitatem eius et diligentiam fecisset libens.